

Sonja Krstanović

Split

PJESME

ŽAJA

Di se dažji ne ufaju
Ki z oblakov rastu nice
Šumnin krošnjan da zasjaju
Namo letu moje tice

Ognji zor ne se užiju
San brez snov di cveta
Ini glasi ne dosiju
Rujnih mor se val tiša

Va izvore nanavidne
Strila zine metu najde
Z unu bandu od zrcala
Di ka sunce lice zajde

VA GLAZBE DAŽJIMAN

Vse secje
Raskračunalo
Z vsih stran se
Svitlost toči

Zgor mriž sveta
Mi plovimo
Va gajetah
Bistrih očih

Glazbe dažji
Nas zibaju
Ružu srca
Rose glasi

A z simena
Ovog sjaja
Zjura će se
Mraci zleć

Okovat će
Šume puti
I načemo
Nać se već

MORE Z KAMPANELA

Z kampanela
More zajde

Kuće potopi
I puti

Na jarbol crikve
Misec sede

I va mriže nas
lati

STVARANJE SVETA

Telo moje crikva je
Va njoj srce kampanel
Z koga more
zlije se

Potopi zemljo nebo vse
Zrcalo bude od ognja
Va komu ti ogledaš se

I kako prvo Bog z vode
Ljubavlju svojon z mene ti
Nov stвориš svet
Po liku svon

DAR

Raskovat ću telo va prstenje
Po ticamin tebe darovat

Va rosu ću snove pretočit
Od nje zlatne ključe sakovat

Ča vsa vrata otpiraju
Od života i od smrti

A moru se ljubav zvat

SKINIMO Z SEBE TELA

Skinimo z sebe tela
Neka mravih budu kuće

Triba nan je malo mesta
Zgoru sveta zgoru vsega

Nek zatrepe dubah vrsi
Zemlju projdu jeni srsi

I popada jasno voće
Z nebeskih modrih gran

Zlatne krušve i jabuke
Va dubljine ocean

KAD ZASPEŠ VA MENI

Pitat ću tice
Jesu te intrale
Va sunčanin dvorin
Modriman putiman

Pitat ću ribe
Va moru dunboken
Čuje li se za te
Je te ki vidil

Pitat ću mrave
Šaplje li ča zemlja
I ružu je rosa
Donila ki glas

Ma niki već
Te neće znat

Va meni

Kada zaspeš
Za vavik

MRAVI

Z velog kabla steče noć
Va mrave — žive kapljice

Z kih jopet će vela doć
Jerbo su joj zibalnice

KAMPANELI

Kampaneli
Mosti beli
Zač ste
Nebo poleteli

Strile uma
Štit nebeski
Ne slomile
Va snu modron
Se zgubile

Od zemlje se
Odilile
A žal zvezd se
Ne latile

GRAD VA DAŽJU

Dršče i zeleni va dažju
Kako va milijar srebrenih dlanov
Grad lačen va kapi mrižu
Ku vetar ziblje

I kako mlada
Ča strepi pod velon
se para

Doklec nebo
Ga srebrenciman
posiplje

LJUBAVNI ODGOVOR

Ti govoriš
Da su oči moje
noć

Z ke nigdar
Nečeš zač

Da su kose moje
More
Ko ti šaplje
Modre snove
vajk

Skroz neveru
Ča te nose
Barke da su
Riči mile

Miči botunići
Na mojoj haljici
Da su kračunići
Ča te od sna dile

Zač da činin
Noć skončat
I zač more
Ne šapljat

Kračuniće
Zač razbit
Zač barčice
Potopit

I zač
Tebe
Dragi
Usnit
Usnit

GLASI Z LEVANTA

Z levanta
Rosni glasi

Suze zore
Nan se kažu

Otpire se
Barkun noći

Daž sunčani
Zemlju moći

Z mraka staje
Veli cvet